

Necrolog per Barla Decurtins-Bear 1927–2011



Cara tatta

«Strusch in'jamna ei vargada che nus essan sesi ensem tier ina pizza e fatg viva cun in glas vin. Oz stundel jeu cheu avon tia bara e miu cor e miu patertgar ein empleni cun tristezia. Schi spert eis ei schabegiau. Pater-tgond suenter co Tia veta ei stada astgel jeu dir: Malgrad tes 84 onns eis ti restada aviarta, independenta, restada giuvna, segidada ed insumma l'entira veta has Ti dedicau a Tia famiglia.» Cun larmas els egls ha la beadia Nina Hutter priu comiau da sia tatta Barla Decurtins-Bear tier la sepultura a Sedrun.

La Barla ei naschida sin Gionda sco feglia da Onna Maria e Vigeli Beer-Monn ils 6 da mars 1927. Ella ei carschida si ensem cun siat fargliuns e passentau ina affonza sco ei era da quei temps: Luvrar, segidar, scola e baselgia. Ina veta purila che pretendeva da pign ensi da mintgin siu pensum. Malgrad ils dirs temps ha ella, sco aunc biars da quellas generaziuns, raquintau bunamein cun encarschadetgna sur da si'affonza e giuventetgna.

Suenter las scolas dalla val ha Barla saviu luvrar a Glion per cuort temps. Ord motivs che la famiglia a Sedrun basignava agid eis ella returnada a casa e dasperas supriu lavur el hotel Oberalp. Cun strusch 22 onns ils 21 da matg 1949 marida ella Al-fred Decurtins. In onn suenter ei igl emprem fegl, il Silvio, naschius. Els han bandunau Tujetsch e supriu il hotel Cruna a Glion. Tier la construcziun dils implots electrics en la CADI na-van dils onns 1956 ha ei dau caschun da luvrar e la famiglia Decurtins ei returnada en la val per surprender il restaurant Krüzli. La famiglia era carschida, 1951 il fegl Hans, e 1955 l'emprema feglia Trix. Pér cun 36 ha ella aunc retschiert ina feglia; la Claudia. Lavur el menaschi e veta da famiglia han pretendiu bia stentas per bab e mumma .

La Barla ei segir stada en in cert grau ina piuniera. Sedrun sco liug per hosps ha era influenzau e motivau ella da prender part da quella veta. Aschia eis ei sedau ualti spert ch'ella ei ida cun skis, ella ha acquistau la patenta da scolasta da skis per affons. Varga 30 onns eis ella sededicada a quella biala clamada. A cons affons vegn ella a ver mussau ils emprems pass, ils emprems crauns sin quellas aissas? In fatg che vegn a ver mantenu ella tier biars en buna memoria.

Odem Sedrun ein els secasai igl onn 1963 e diesch onns suenter han els acquistau la casa Colina a Niregl. Barla ha habitau cheu tochen il di ch'ella ei serendida en casa sogn Vigeli.

Gronda legria ei segir stau cura ch'els dus ein vegni tat e tatta. Denton ha ina greva malsogna pretendiu la mort digl um Alfred. Veta e mort sebrattan giu ed igl ei nies destin da dumignar quellas midadas. Ulteriuras naschient-schas da biadis e biadias han purtau nova legria alla tatta. Ella ei segidada e giu in esch aviert per tut tgi che ei vegniu. Ella ha pertgirau ils affons, ha cusiu, fatg catschiel, ha cuschnau e dasperas era giu quitau dil frar Nazi sin Gionda. Sper quella lavur e

stenta eis ella selegrada onn per onn das sias rosas avon casa e forsa il pli bugen prendeva ella il temps per in scart troccas.

La carriera da skis ei veginida interrutta cun in accident che ha mess en scalgias ina schanuglia. Navenda lu ha ella mai pli tuccau en ils skis. Prender decisiuns e tener ellas ha ella adina saviu. Aschia ha ella calau cun il fimar, cun ir cun auto e sezza sedecidida da serar igl esch casa e serender en casa da vegls igl onn 2009.

«Cara tatta, nus havein astgau sentir tia crezia. Tier tut nies far, tier nos quitaus e plaschers has ti adina puspei envidau si ina candeila e fatg orazion per nus. Ei era buca tia moda e maniera da setschintschar sur da problems: Tiu agir era auters. Contas gadas havein nus surpriu tei cun nossas visetas, cun amitgs ed amitgas mo adina has ti beneventau nus, has pinau ina meisa tgembliida, has empristau tiu auto ni schizun sez menau nus entuorn en quel.»

Cara tatta, engraziel per tut. En nies cor restas ti adina cun nus.

Tes cars